

R Lond. 11. Jul. 1664

N. 959. A Paris le 5^e Juillet 64
25 Juin 64

Monsieur

J'ay receu celle qu'il vous a plu me faire l'honneur de
m'escrire du 20^e/₃₀ de Juin, & me resiois fort de ce qz vous auez
fait le voyage heureusement & qz vous soyez arrive a Londres en
une bonne & parfaite sante. Dieu vueille qz vous vous en reue-
niez de mesme, ioyeux & satisfait, cela veut dire, qz vous y
faciez bien ce que vous y estes alle faire, autrement Je m'asseu-
re que vous ne reviendrez pas content, car Je iuge de vous comme
de moy qui ne me porte iamais bien si mon affaire va mal;
Je ne scay si vos expedients vous meneront plus tost la ou vous
voudriez aller, mais J'en doute, le grand chemin est ordinaire-
ment le plus court, & quelque fois quand on pense arriver plu-
tost en prenant la traaverse on s'esloigne, mais il ne faut rien ui-
ger deuant que de voir ce que vous respondrez par dela, tousiours
Je croy qz par deca on sera bien aise de voir qu'il y a aucun chan-
gement, & qu'on vous face changer de batterie, la breche n'en
sera pas si tost faite; mais quoy que ce soit Je vous supplie ne point
quitter le lieu, & que nul degoust vous en donne seulement la pensee,
mais acheuons icy comme nous y auons commence, & J'en respous de vous
donner icy un troisieme aux deux que vous auez nomme, qui sera
peut estre le moins satisfait des trois. Vous auez Monsieur cepen-
dant la bonte de ^{me} continuer l'honneur a me faire part de vos nouuel-
les; si elles seront bonnes, J'en auray de la ioye, si elles ne le sont pas
Je ne laisseray pas d'y prendre l'interest que Je dois; ma femme vous
baise bien humblement les mains, & vous rend graces de v're obligeant
souuenir, elle n'entre pas plus volontiers dans mes sentimens sur aucun
sujet, que quand Je me dis Monsieur ce qz veritablement Je suis
c'est Monsieur
Vre tres humble & tres obeissant
seruiteur
372
H. de S.

Monsieur Vous ne mandez pas ou vous estes loge, Je suis obligé de mettre cette breche dans le couuert
du secret

373

et Monsieur

Monsieur de Fylichem

M

